

2 King Gulagulau Viruaina

Pariverena

Gulagulau ai buka viruaina lamna mai Israel e bababaniei. Gulau David ana vibadana au murina, aiwai i tupua lamna wei bukai ruağa gulagulau naona ma viruiaina e ririweta. Gulagulau bukana naona e ririweta David au murina Solomon menanarena da i vigulau.

Solomon i'raġe ma au murina Israel i kai da baba ruağa. Dobuna au rauanaġei i ġorei Judah ma au lavaratei i ġorei Israel. Maranai mai Judah ma mai Israel gulagulau, God i voteletelei lamna nuaba i mae. Wate maraġela gulagulau God i rawaġaiġaiei ma god ġelau i raudunelei. Anina ma nuabola i tupua.

Maranai mai Israel God votelatelana i voterei, Tauna peroveta i paritawanei awari. Ma Gulagulau bukana viruaina au orana lamna peroveta wavana naenaena Elisha. Tauna God ana rewapanei kua ġaeġaei i kaukauei, ma rava awari i jimajima da ita mae-tavirei God awarina.

Elisha i'raġe ma au murina, gulagulau maġamaġau i apoapoe kua. Anina ma God ana rava i kovoġi ma lamnei ai ġavia tau i vovaiubai ma i pani ma i naiei. Au naona mai Israel awari i tupua ma muriai mai Judah awari i tupua. God ana rava mai Judah eġa ita vianinei da ita nae me ai au dobu da madeġa 70 i kwa.

Virarautua rereġana

Israel i kai da Vihadana ruaḡa, Israel ma Judah
1:1–17:41
Peroveta Elijah ana virarautua 1:1–13:20
Judah gulagulau ma Israel gulagulau ai vira-
rautua 8:16–17:4
Assyria gulauna Samaria i vovaiubai ma Israel
i pupuna-naiei ma ana vihadana i kwa 17:5-40
Judah gulagulau ai virarautua 18:1–21:26
Gulau Hezekiah ana au vibada i raukarei ma
i nae da gulau Josiah ana au vibada 18:1–
21:26
Judah gulagulau damona ai virarautua
23:31–24:20
Babilon gulauna Jerusalem i vovaiubai da Ju-
dah ana vihadana i vikwai 25:1-30.

2

Elijah i ḡaiei au mara

¹ Ma mara i ḡetai da BADA Elijah labuei ita ḡaiei au mara. Elijah ma Elisha Gilgal i voterei ma i nenaē.

² Ma Elijah, Elisha i riwei i pa, “Weka ma mae ma BADA i riweu da ana nae au Bethel.”

Wate Elisha i paribelei, “Riwa kaua da BADA lawalawaina ma nanare tam lawalawaim, tau nanare eḡa melanai ana voterem.” Anina ma airuaḡa i ḡaira au Bethel.

³ God ana peroveta borui au Bethel maemaēi i opui Elisha awarina ma i riwei i pa, “Tam u aramanei da BADA am bada amadodo awarim ina vaitawanei?”

Elisha i paribelei, “Ee a ’ramanei, wate lamna eḡa ona babaniei.”

⁴ Ma Elijah, Elisha i riwei, “Weka ma mae, BADA i riweu da ana nae au Jeriko.”

Wate Elisha i riwa, “Riwa kua da BADA lawalawaina ma nanare tam lawalawaim, tau nanare ega melanai ana voterem.” Anina ma tau i nae au Jeriko.

⁵ Ma God ana peroveta borui kampa au Jeriko maema ei i opui ma Elisha i nebelei ma i riwei, “Tam u aramanei bo da BADA am bada amadodo awarim ina vaitawanei?”

Elisha i paribelei, “Ee a ’ramanei, wate lamna ega ona babaniei.”

⁶ Ma Elijah i riwei, “Weka ma mae, BADA e paripari-tawaneu au Waira Jordan.”

Wate Elisha i paribelei i pa, “Riwa kua da BADA lawalawaina ma nanare tam lawalawaim, tau nanare ega melanai ana voterem.” Ma airuaega i babara nae.

⁷ God ana peroveta 50 tau i votaḡotaḡoi, ma au muri i tumairi maranai Elijah ma Elisha Waira Jordan au adana i tumairi.

⁸ Elijah ana kwama i votawanei ma i piri ma lamnei waira tepana i ravi. Da i vilamonei au oiena ma au kelakelauna ma tau i au pouna au alalana i babara damana.

⁹ Maranai au baba ḡelauna i ḡeta Elijah, Elisha i riwei, “Ma riweu aiwai ana kauei aubaim muriai da ina ḡaieu.”

Ma Elisha i paribelei, “Tau am gabu ana vaia da peroveta ai bada lamna aubaina a ḡoei da am rewapana ḡaeḡaena, ma viaitepatapani ma ma veredamaneu.”

10 Elijah i riwa, “Lamna kua piripirina e vivibaḡei, wate mepa da u inanai ina ḡaiḡaieu, lamna u vivibaḡei u vaia ma eḡa, lamna eḡa.”

11 Ma airuaḡa i bababara ma i vibababani ma hosi araratana, chariot araratana i taina ḡetei ma tau i raviḡori. Ma Elijah ma Elisha au poui i ruba ma BADA Elijah labuei i ḡaiei au mara.

12 Elisha wei i ’nanai ma i garara, “Amau! Amau! Mai Israel taugagaloeina vivirewapana! Tam u nae!” Ma Elijah eḡa ita inana-melei. Nuanuana i bola-kauei ma ana kwama au pouna i sikai.

13 Ma Elisha i nae ma Elijah ana kwama au doa i vivipeunia, maranai i ḡaiḡaiei au mara, i voepai ma i nae me waira au adana.

14 Ma kwamana i peupeu i vaia ma waira tepana i ravi ma i riwa, “BADA Elijah ana God mepa?” Maranai waira i ravi, waira i vilamonei ma au pouna au alalana i babara damana.

15 Jeriko ai peroveta boruna 50 au weia ma i ’nanai aiwai i tupua ma i riwa, “Elijah ana rewapana i damana Elisha awarina.” Ma i nae da ita nebelei ma i mae-ḡaira au doa ma i raudune.

16 Ma i riwa ipa, “Tauai rewapana 50, ma paritawanelai da am bada ana baiei. Mepa da BADA Aruana, Elijah i voepai da mepa au ola bo au gaugauba i teretawanei.”

Elisha i paribelei, “Eḡa! Eḡa ona nae.”

17 Wate tau i voiḡiriḡiri da tauna i vinimala da i paritawanei i pa, “Anina ona nae.” Wate tau 50 aupom tonuḡa i baia ma eḡa ita nelaḡai.

18 Maranai tau i nememei au Jeriko, Elisha tau i riwei, “A riwemi da avena ota nae!”

4

Elisha wavine Shunemei i voagui

⁸ Mara tagogi Elisha i nae au Shunem taon.

* Weka wavine manemanena i mae, ma Elisha i vibaḡa-guratei da ita mae da ita am. Ma maranai Elisha wei au dobuna e vaḡavaḡai, tauna weka i amam.

⁹ Wavine awana i riwei, “Aramanei da orotona weka e nenei lamna BADA ana peroveta vivivireina.

¹⁰ Ana numa aburuna au poewa† tana voai ma ani matave, kepakepa, ani kiala ma rampa tana terei au orana tauna aubaina. Ma kampa ina mae maranai e nenei.”

¹¹ Mara tagogi Elisha i nei ma i ḡae ana au numa da i rauvirai.

¹⁴ Muriai Elisha ana taunola wavana Gehasi i paridadanei, “Aiwai ana kauei wavinena aubaina.”

Ma Gehasi i paribelei, “Tauna eḡa natuna orotona ma awana i magura.”

¹⁵ Ma Elisha i riwa, “Ma ḡoreiai.” Ma Gehasi wavine i ḡoreiai ma i nei da au metaeta i raumairiei.

¹⁶ ✧Ma Elisha wavine i riwei, “Wenanare marana madeḡa au ḡelauna tam natum orotona ma ḡuniḡuni.”

Wavine i paribelei, “Eḡa au bada. Tam peroveta ma tau am taunola, eḡa ma morui!”

¹⁷ Wate wavine i raumanawa. Ma marana wenanare madeḡana au ḡelauna wavinena natuna orotona i ḡuniḡuni, Elisha i ririweia nanare.

* **4:8:** Shunem taun 50 Km da au Samaria taun. † **4:10:** Mai Israel ai poewa dabadabai. ✧ **4:16:** Gen 18:14

Elisha rava 100 i viambagibagi

⁴² Mara ġelauna, oroto tagogi melagai Baal-Shalishahei i nei. Tauna nai madeġana witina naona i labai ma palawa i apui da iavana 20. Ma witi majiġai baikena maiteni i neiai da Elisha i verei. Elisha ana taunola i riwei, “Rava lam[‡] ma verei da ina am.”

⁴³ Ma ana taunola i garara, “Aiwai! Wei lam eġa tagotagogina da rava 100 tana viambagibagi?” Wate i paribelei i pa, “BADA i riwa da rava ma verei da ina am ma lam ina mae-terei.”

⁴⁴ Ma lam au naoi i terei ma tau i am ma lam i mae-terei, BADA i ririweia nanare.

5

Elisha Namaan i vilawani

¹ Namaan lamna mai Syria ai sorodia badana. BADA, Namaan awarina i mae ma lamnei ai ġavia i vovovai-ubai. Ma lamna aubaina ai gulau, tauna i vivirana-kauei ma i vitumaġane. Namaan sorodia wavana naenaena wate doria lepera i vaia.

² Marana patapatai mai Syria i nenei au Israel i viviġavia. Mara tagogi tevera guguinina i pani da i naiei da ai bada Namaan awana i verei da ana taunola.

³ Mara tagogi guguinina ana bada wavinena i riwei, “Au bada, am bada uta riwana-dadanei mepa da ita nae perovetana au Samaria maemaena awarina. Tauna ana doria ita inanai ma ita vilawani.”

⁹ Ma Namaan ana hosi ma chariot borui i nae ma Elisha ana au metaeta i raumairiei.

[‡] **4:42:** Peroveta ġelau Elisha maiteni i mamae, kampa gomara i peu ma rava i vinuapoapoe.

10 Wate Elisha taupariverena i paritawanei da i riwei i pa, “Ma nae da au waira Jordan ma oġa-melem mara seven ma lepera doriana ina voterem ma opim ina ai-me.”

11 Wate Namaan amlona i ġaiġai kauga ma i riwa i pa, “Tau au nota ġaeġaena da peroveta ita opui da ita inanaiu da urana, opiu au tepana mataira ita kauei ma ana BADA God awarina ita raupari da ata lawana.

12 Wate waira Amanah ma Pharpar au Syria i ai telera eġa me Israel wairai. Tau kampa ata toa ma ata lawana.” Ma Namaan i mae-tavirei ma ana amloġaiġaina i nae.

13 Ana laralaraga i nae awarina ma i riwei, “Au bada mepa da ita riwem da aiwai piriipirina uta kauei, lamna uta kauei tapa? Wei lamna kauga telatelana i ririwei nanare, ‘Ma toa ma ma lawana.’”

14 Ma Namaan i ġaira au waira Jordan ma mara seven waira au orana i ġaira, me peroveta i ririwei nanare. Ma opina i ai me da me tevera tupuana nanare ma lepera doriana i kwa.

15 Ma Namaan ana laralaraga maiteni i nae me Elisha awarina ma i riwa, “Marina aramane i da au dobu, god eġa ita mamae anina Israel ana God tauna ava; lamna aubaina au bada pulo a vereverem ma vaia.”

16 Wate Elisha i paribelei, “Riwa kauga da BADA a vivitaunolei lamna BADA lawalawaina, ma wavanai a ririwa tau eġa pulo ana vaia.” Ma Namaan i babani bagibagi da Elisha pulona ita vaia, wate tauna pulona i geduaiei.

17 Ma Namaan i riwa, “Mepa da nanare lamna ma vianineu da donki ruaġa ai vita ruvana Israel

doana ana vigerui da ana naiei au numa. Ma marina da e nenaē, eḡa melanai pulo ana apui bo sia taputapuna ana apui god ḡelauī awarii, anina BADA ainelana awarina.

¹⁸ Tau am taunola ma a ḡoei da BADA au ḡoa apoapoei ina nota-tawanei, kaua tagogi ava awariṇei; maranai au gulau a ruiṛuei ana au tempol ma tauna au urau e vovojijina ma maiteni a mamae-ḡaira ma Syria ai god Rimmon a viviborumei.”

¹⁹ Elisha i riwa, “Ana nuaubam ma nae.” Ma Namaan i nae.

Mai Israel ai gulau Ahab au 851 BC. i'raḡe. Au murina gulagulau ḡelauī i mae ma tauī au Samaria i mae. Maranai Hoshea i vigulau. Au 724 BC. māi Assyria ai sorodia Israel i viḡaviei.

17

Samaria i peu

Mai Israel ai gulau damona lamna Hoshea. Tauna i mae gulau au Israel madeḡa 9, wate Assyria ai gulau i paripariniḡaiei ma lamna aubaina i pani.

⁵⁻⁶ Assyria ai gulau Israel anatapuna i naeni, da i ḡeta da Samaria taon I mae-kwaviviroi, ma i gudu-tomeni da madeḡa tonuḡa i kwa. Maranai Hosea ana vigulau madeḡana 9 i ḡetai, Mai Assyria Samaria taon i ruini māi Israel i pupuna-naiei au Assyria. Ma au Halah, taon, waira Habor au ririvana ma māi Mede ai au taon nununai i verei da i raunuma.

⁷⁻⁸ Wei kovoḡai i nei māi Israel awari aubaina tauī god ḡelauī i viviborumei. Tauī ai ḡoa apoapoe

i rata kaua BADA ai God awarina, Wariāga Tauna Egypt ai gulau Pharaoh au urana Israel i vai-tawanei ma aiaii i ravena-opunei. Mai Israel ai God eteni i pupuna-opunei ai kaua i votaḡotaḡoi da i kaukauei ma kaua waduboi ḡelau Israel ai gulagulai i kaukauei.

⁹⁻¹⁰ Mai Israel kaua apoapoei i kaukauei BADA ai God awarina ma BADA wei kauai eḡa ita vinuaiaiei. Tau i voepaepa gabui i voanaiei god morumorui voepaepaei aubaina au taon nununai, melagai aburuoina da au taon ḡaeḡaei. Ola muomuoi anapui au tepai ma ai anapui au ḡoui gana vinualaulau i terenaiei ma Asherah ana tuatua ma kokoitau i vituramairini.

BADA mai Israel ai ḡoa apoapoe aubaina i viopuni

²⁴ Assyria ai gulau taon nununai ravai mai Babilon, Cuthah, Awa, Hamath ma Sepharvaim i vivaneiai da Samaria, ana au taon nununai kampa i terei da i mae. Tau i mai Israel numa i ruba-tawanei i raunumei.

²⁵ Vouvounai wei ravai eḡa BADA ita viborumei, lamna aubaina lion ḡelau i paritawaneiai da rava i viviraḡeni.

²⁶ Ma rava Assyria ai gulau ana riwa i paritawanei i pa, “Rava au Samaria u terenaiei, dobuna Godna ana tarawatu eḡa ita aramanei. Lamna aubaina ma dobuna ana God, lion i paritawanei ma ravai e viviraḡeni.”

²⁷ Ma mai Assyria ai gulau rava i egari, i pa, “Pirisi tagogi au Samaria o panipania,

ona paritawana-melei ma, dobuna ana God, ana kaua ravai voui ina viararamani.”

²⁸ Anina ma pirisi tagogi au naona i naenaei au Assyria i neiana-melei da au Bethel i mae. Kampa rava i viararamani da BADA viborumei.

²⁹ Wate jentail ravai nununai ai god moru-morui kokoitau i kaukauei ma metauna au taona i mamae, kampa ola au tepai au naona mai Israel au Samaria ai voepaepa gabui i voavoailana, kampa i terenaiei.

18

Hezekiah i mae mai Judah ai gulau

¹ Elah natuna Hosea i vigulau au Israel madeġa tonuġa i kwa. Wei maranaina au Judah Hezekiah, Ahaz natuna i vigulau.

² Tauna ana madeġa 25 ma i vibada au Jerusalem da madeġa 29 i kwa. Alona Abi, Zekariah natuna.

³ Tauna kaua aiiai avai i kaukauei BADA awarina me noina David nanare.

⁴ ✧ Ma god morumorui ai ani voepaepa gabui anatapui i votawatawanei. Ma kokoitau i viairikarikai ma Asherah tuatuaana i taratuituina-naiei. Ma wariaġa Moses mota bronzei, kokoitau i kauei, i viborumei. Hezekiah motana kokoitauna maiteni i viaigimagimai. (Mai Israel motana i ġorei Nehushtan.)

⁵ Hezekiah BADA, Israel ana God i vitumaġanana-kauei. Eġa gulau ġelauna au Judah nanare me tauna, ma eġa aiiai ġelauna nanare au naona i mae bo muriai i mae.

⁶ I vipatutu BADA awarina au anatapuna ma i vovoguratei da God ana tarawatu Moses i vereverei anatapuna i vovotaḡotaḡoi.

⁷ BADA tauna awarina i mae ma ana nola anatapuna i davudavu. Tauna Assyria ai gulau i parivirevirei ma eḡa aubaina ita vilaraga.

⁸ Ma mai Philistia anatapui i vovaiubai, melaḡai da taon ḡaimei garigarina anatapuna i pupuni da au Gaza i ḡeta.

Maranai Hezekiah i'raḡe, Manasseh amana i raviepaiai da i vigulau.

21

Manasseh i vigulau au Judah

¹ Manasseh ana madeḡa 12 ma i vigulau au Jerusalem, ma i vibada madeḡa 55. Tauna alona Hephshibah.

² Wariaḡa BADA eteni ravai i virubai ai kauga vinuamedamedai aubaina maranai mai Israel i ruirui au Canaan. Manasseh wei ravai ai kauga i votaḡotaḡoi da i kaukauei ma ana ḡoa apoapoe i rata BADA au matana,

³ Manasseh ola muomuoi au tepai god moru-morui awari voepaepa gabui amana i viairikarikai, i voa-melei. Ma nanare pulo aniapuna i voanaiei Baal awarina, ma Asherah tuatuaana i tonanaiei me Israel ana gulau Ahab. Manasseh wate nanare ubona i viviborumei.

⁴ ✧ Tauna god moru-morui ai pulo aniapuna i voanaiei BADA ana tempol au orana, wei gabuna aubaina BADA i riwa i pa, “Wavau au tempol ina mae.”

5 Tempol au metaetana, gabu garigarina au orana Pulo aniapui ruaḡa i voai ubona god aubaii.

6 Manasseh natuna orotona ai au araratana i apui ana pulo,* ma parauma ma baravu ma gweri da ginauri ravai i rautaniḡanei. Kaua maḡamaḡau apoapoe kaukauai i kauei ma BADA amlona i ḡaiḡai kaua.

10 Ma lamna aubaina BADA ana peroveta awariei i babani i pa,

11 “Gulau Manasseh kaua maḡamaḡau vinu-amedamedai i kaukauei, ma tauna i apoapoe kaua eḡa me mai Amori, tau i wei dobuna i maeni muriai da mai Israel. Ai kokoitau miramirai awariei mai Judah i raveni da i ḡo’apoapoe.

12 Lamna aubaina BADA Israel ana God wenanare e ririwa, ‘Kovoḡa ḡaeḡaeotana ana neiai Judah ma Jerusalem awarii da maranai rava anatapui riwana taniḡaiei ina nonori ma orai ina auepai.

13 Ruvana tagoginei Samaria a kovoḡi ma ruvana tagoginei Jerusalem ma Israel ai gulau Ahab ana epaepaia maiteni a kovoḡi. Jerusalem ravai ana amaḡa-tawanei, me aboma ita amamaḡi, ma i vitaragabubui.

14-15 Au rava i ḡo’apoapoe awariu, maranai noinoii Egypt i opu-tawanei da marina. Wei e viviamloḡaiḡainiu. Ma rava mamae-terenai ana inana-tawanei, ma ana veredamanei ḡavia awarii ma tau i ina vovaiubai ma ai purapura ina kwalei.”

* **21:6:** I apui mai Canaan ai god Molek awarina.

16 Manasseh mai Judah i raveni da god moru-
morui i viborumei ma BADA i vijiboḡi; wate eḡa
lamna ava ma rava aiaii i viraḡena labalababai da
tara i kororo da Jerusalem etanaina i vioai au giana
da au giana:

18 Manasseh i'raḡe ma ana numa au ririvana
dobu wavana Uzza ana au wapu i doboi, Ma
natuna Amon ana gabu i vaia da i vigulau.

Amon i vigulau au Judah

19 Amon ana madeḡa 22 ma i vigulau. Ma
i vibada madeḡa ruaḡa au Jerusalem. Tauna alona
Meshulemeth, oroto Jotbahei wavana Harus
natuna

20 Tauna ana ḡo'apoapoe, i rata kaua BADA awa-
rina me amana nanare.

21 Amana i ḡovaivaitei ma god morumorui
i viborumei.

22 Tauna noinoii ai God, BADA i rawaḡaiḡaiei ma
ana tarawatu eḡa ita votaḡotaḡoi.

23 Ana gabemani babadai Gulau Amon i viogei
da ana au gulau numana i viraḡeni.

24 Wate mai Judah, rava gulau Amon viraḡenana
i viogatarei anatapui i viviraḡena-naiei ma natuna
Josiah i terei da i vigulau.

22

Josiah i vigulau au Judah

1 Josiah ana madeḡa 8 maranai i vigulau au Judah
ma i vibada au Jerusalem madeḡa 31. Tauna alona
Jedidah, oroto Boskathei Adaiah natuna.

2 Tauna BADA au matana aiwai ana tapuna i kauana-kauei ma noina David au ivina i tua ma BADA ana tarawatu ana tapuna i votaḡotaḡo-kauei.

*Josiah nelara ḡelau i terei da BADA ana tempol i voavoa-virai lamna maranaina Moses ana tarawatu au buka i girugirumi i nelaḡai da i nei*ai* Josiah awarina.*

11 Maranai gulau i nonori aiwai Tarawatu au bukana i girumi, ma ana gara i viaisikasikai.

12 Ma gulau Josiah ana taunola piri*si* Hilkiah, Saphan natuna Ahikam, Micaiah natuna Akbor, Shaphan gulau ana taugiruma ma Asaiah gulau ana tauvinuaterena i riwei i pa,

13 “Noinoita wei bukana riwana eḡa ita votaḡotaḡoi, ma aiwai i ririwei eḡa ita votaḡotaḡoi, lamna aubaina BADA amlona i ḡaiḡai awarita. Lamna aubaina ona nae au tempol ma BADA awarina ona raupari tau ma wei dobuna ravai aubaii ma Judah ravai ḡelau i aubai. Ma ona paridadana wei au bukana aiwai i girumi.”

Josiah ana taunola babadai i nae BADA ana peroveta tagogi awarina. Wei perovetana lamna wavine ma riwa i paritawanei i nae me gulau awarina.

16-17 BADA wenanare i riwa, “Tau wei dobuna ma dobuna taumaenina ana kovaḡa kauei.” I girugirumia nanare, ma lamna gulau awarimi i ’avi, BADA wenanare i riwa, “Tau i geduaieu ma god ḡelau i viviborumei ma lamna i viamloḡaiḡainiu. Jerusalem awarina orau amapo da e ararai ma amapo eḡa ina dauva.”

18 Wate ona naeme Judah gulauna, i paritawanemi awarina da ona riwei, “BADA Israel ana God e ririwa da

19 Maranai u nonori menanare Jerusalem ma taumaenina ana kovoḡanei. Tam u rupena ma u vilamolamona tau BADA awariu, am gara u viaisikasikai ma u tou, Tau ana kauēi da ina apoapoe kaua, rava ma dobu ana kovoḡi da eḡa aiai wei doana ina maeni.

20 Ma kovoḡana a neneiai au Jerusalem eḡa ina nei da am iraḡe au murina. Ana voterem da ana nu-aubam ma iraḡe.”

Ma wei pariverena i naiei ma gulau i riwei. Josiah god morumorui viborumai i viḡaei.

23

Josiah i parivainuaḡana da ina votelatela

1 Gulau Josiah babada anatapui au Judah ma Jerusalem i ḡoreiai.

2 Ma pirisi ma peroveta ma rava molamolakana da manemanena, anatapui i ḡae BADA ana au tempol. Kampa gulau parivainuaḡana bagibagina bukana tempol au orana i nenelaḡaia i iava-tapui awarii.

3 Gulau ana au gabu i mairi tempol tuatuana au naona ma BADA maiteni parivainuaḡana bagibagina i ravivouini da tauna BADA ana tarawatu ma ana riwa bagibagina orana ma aruana taputapunei ina vojijini, i ririwei nanare au bukana. Ma rava anatapui nanare i parivainuaḡana.

4 ✧Ma gulau, pirisi ḡetelarana Hilkiah, ana pirisi babadai ma tempol taupainii i egari da BADA ana tempol au orana aiwaiei Baal ma god wavinena Asherah ma ubona godna morumorui

i viviborumei anapui ita opuneiai. Gulau wei purapurai anapui i naiei da gaugauga Kidron au ririvana i apu-naiei, ma lapukarei i vivanei au Bethel.

Anina ma Josiah mai Judah ma mai Israel ai dobu i naeni ma mepa rava kokoitau i raudunelei ola muo-muoi au tepai anapui i pupuni ma pirisi kokoitau tauduneleina anapui i vira^geni.

Ma gulagulau aiavoi Josiah i vota^gota^goi tau BADA e^ga ita vivirei ma ai ^goa i apoapoei BADA awarina.

Wedau Mark
The Gospel of Mark in the Wedau Language of Papua
New Guinea
Buk Mak long tokples Wedau long Niugini

copyright © 2010 Wycliffe Bible Translators, Inc.

Language: Wedau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-30

PDF generated using Haiola and XeLaTeX on 28 Dec 2024 from source files dated 31 Aug 2023

aa19f3e3-98fb-51fa-9c53-3906edc75f11